

# Linda, BMI 16,5

Leseprobe

Ein Jugendstück  
von Katharina Baumberger

© Katharina Baumberger

[www.theaterprojekte.ch](http://www.theaterprojekte.ch)

# 1. Akt

## Zuhause bei Claire

**Intro: alle Rollen // alle Jugendlichen, Video-Models, Mutter Schneider**

### 1.1. Szene

#### alle Figuren des Stücks // Vanessa

*Alle Figuren treten einzeln auf (Musik) und prüfen vor imaginären Spiegeln ihr Aussehen. Je eine Person stellt sich auf, bewegt sich (Parfum oder Kamm, Kleid, Deo, Mundspray, Mütze, Pickel, 3x etwas umdrapieren,...) und geht dann mitten in der Handlung in ein Freeze, bis alle gespielt haben. Vanessa ist als Letzte an der Reihe. Mitten in ihrem Spiegelspiel klingelt ihr Handy. Während sie es aus der Hosentasche fischt, gehen alle anderen ab.*

Vanessa            Ah, du bisches, Grosi. Häsch wieder Problem mit em Compi?  
                           *(hört zu)* Aha, öppis anders.  
                           E Farb wähle? *(hört zu)*  
                           Los, Grosi, das isch lieb, aber ich zieh die Socke nöd a, wo du mir  
                           lismisch. *(hört zu)*  
                           Nei, au nöd, wänni d' Farb cha wähle. Sorry.  
                           Los ich mues jetzt ga.  
                           *(hört zu)* Ane Party. *(hört zu)* Ja, e Party. Das wirsch du nie verstah,  
                           das mir so vill Partys händ, ich weiss.  
                           Ja, ich bsuech dich sicher wider. *(hört zu)* Ja! Aber *(wird*  
                           *unterbrochen)*...aber *(wird unterbrochen)* aber wäge dem muesch mir  
                           nöd jede Tag drümal alüte, Grosi. Ich hänk jetzt uf, gäll! Tschü-üs!

### 1.2. Szene

#### Claire, Susi, Mutter Schneider

*Claire trägt Getränke herein. Ihre Mutter läuft ihr hinterher.*

Mutter            Barbara...!

Claire            Säg mer nüme Barbara! Ich heisse jetzt Claire!

Mutter            Claire, los. Du magsch ja Diät mache. Aber dine Fründe söttemer scho  
                           öppis uftische.  
                           *(guckt sich die Getränke an, alles Wasser ohne Kohlensäure)*

Claire            Die wüssed, das es bi mir nüt git.

- Mutter                    Das macht doch kei Gattig! Es sind doch eusi Gescht, Liebs.
- Claire                    Mueter, **mini** Gescht, nöd dini, klar?
- Mutter                    *(eilt weg:)* Ich bringe öppis Chlises, ja? Nur öppis Chlises.  
*(ordnet die Kissen auf dem Sofa)*
- (Claire verdreht die Augen. Susi tritt auf, hängt sich aufs Sofa.)*
- Susi                        Wer chunnt alles?
- Claire                    Weg da! *(drapiert danach die Kissen locker-lässig)*
- Mutter                    *(tritt eilig wieder auf:)* So, das gseht doch grad viel fründlicher us!
- Claire                    Usgrächnet Chips. Mein Gott! Häsch e Ahnig, wie vill Fett die drin händ?
- Mutter                    Barba... eh...Claire, bitte!
- (Susi schnappt sich eine Handvoll Chips, dann klingelt ihr Handy. Sie sucht es, kann es nicht finden, kriecht unters Sofa, rennt herum. Claire hat es längst gefunden und drückt es ihr mit einem Kopfschütteln in die Hand.)*
- Claire                    *(zu Mutter:)* So, ich gami fertig go style. Gasch ad Tür Susi, falls scho öpper chunnt! *(ab)*
- (Während Susi telefoniert rückt die Mutter die Kissen wieder in gutbürgerliche Position. Dann bringt sie noch mehr Snacks aus der Küche und geht ab.)*
- Susi                        Ah, du bisches. *(hört zu)* Ja, bi eus dihei. Mini Schwö zeigt de Aloe-Model-Video usem 2007, weisch. *(Pause)* Ja sie fahrt ja voll uf das Züg ab. *(Pause)*... Ja. Am nächste Model-Wettbewerb macht sie ebe sälber mit. Drum nännt sie sich jetzt Claire! *(Pause)* Gäll, voll abgfahre – CLAIRE! *(Pause)* Kei Ahnig ob die e Chance hät. Bsunders hübsch isch sie ja nöd.
- Claire                    *(keift aus dem Off:)* Susi, wo isch mini Haarbürschte?!?
- Susi                        *(verdreht die Augen:)* Und ihri Stimm...e ächti Katastrophe! – Also bis nachher! Tschü-üs!
- Claire                    *(keift noch giftiger aus dem Off:)* **Mini Haarbürschte!!!**

## 1.3. Szene

### Jugendgruppe, Video-Models (Schattenspiel oder Projektion)

*Es klingelt. Susi eilt zur Tür, mehrere Jugendliche treten auf, Claire kommt dazu. Josef und Sandrine treten als Paar auf. Begrüssungen, Küsse, man bedient sich bei den Snacks, setzt sich aufs Sofa.*

*Schliesslich sitzen alle 10 Jugendlichen vor dem (virtuellen) Bildschirm und gucken Modeschau, während im Hintergrund als Schattenbilder 3 Models in wechselnden Posen zu sehen sind. Die Chips werden hin und her gereicht, Claire gibt sie angewidert weiter, Sandrine nimmt nur immer ein einzelnes Chips, die andern futtern gierig.)*

- Claire            Jetzt – das isch sie! (*begeistert:*) D'Linda Janos! Sie hät de Aloe-Model-Contest 2006 gunne und sit da steilschti Karriere gmacht. Mis ultimative Vorbild! Ich will genau so werde wie sie!!! (*ahmt die Posen nach, die man im Hintergrund sieht*)
- Sandrine        Es super Chleid....!
- Lea              En mega Catwalk!
- Sandrine        Und ihri Bei erst...! Ändlos!
- Mady            Hej, aber jetzt mal ehrlich: Die isch doch eifach chnochedürr!
- Claire            Du Banause! Lueg dich nur a. Wie du dich ga lasch! Null Style, null Körperkult!
- Nina             Hei! La mini Schwö in Rueh, gäll!
- Claire            Wännt dich so um sie sorgsch, dänn lueg wenigstens, dass sie öppis us sich macht!
- Mady            Ha! Öppis us sich macht! Mir isch sauwohl so!
- Sandrine        Josef, wie findsch du die? (*zeigt auf Linda im TV*)
- Josef            Moll, ok.
- Sandrine        Was meinsch mit Ok?
- Josef            (*legt ihr den Arm um die Schulter:*) Du weisch doch, dass ich nur uf dich stane. – Nimm ja nöd meh ab! Du bisch **perfekt** eso!!!
- Nina             Chum Mady, mir gönd.
- Mady            Nö. Nanig!
- Pit                (*gähnt:*) Chunnt öpper go game?

Claire                    *(kreischt auf:) Da! Mini Lieblingsstell (spult nochmals zurück)*  
 Ich üebe täglich a dere Pose. Aber so natürlich und sexy wie d' Linda  
 schaff ich's eifach nonig. Lueged eu das a!!!! *(ahmt Linda nach)*

## 1.4. Szene

### Jugendgruppe

- A) Roni füllt bei den Getränken seinen Becher neu auf und kommt dort mit Sandrine ins Gespräch.  
 B) Pit steht auf, die Jungs folgen ihm und sie beginnen übers Gamen zu sprechen.  
 C) Die Mädchen unterhalten sich leise über Frisuren, Kleider und ihren Auftritt an der Modeschau.)

*Jetzt hört man das Gespräch zwischen Roni und Sandrine, Claire holt sich grad ein Glas Wasser und bekommt die Unterhaltung mit.*

Sandrine                Ich mach jetzt eifach mal mit, gäll.

Roni                     Logo.

Sandrine                Kei Ahnig ob ich e Chance han!

Roni                     Also, ...ich find dich rächt hübsch.

Sandrine                *(verlegen:)* Merci. - Es isch ja au en Model-Contest für Afänger.

*(Fokus aufs Gespräch zwischen den Jungs:)*

Josef                    *(zu Pit:)* Wette du bisch nanig uf Level 77! 12 Levels i einere Nacht?!?  
 Du bisch voll abgfahre!

Pit                        Scho sicher Mann! Ich ha das Spiel brutal im Griff!

*(Tobias versucht immer wieder etwas zu sagen, kommt aber nie zu Wort:)*

Tobias                  He, ich han im Fall...

Josef                    6 Levels ok, aber 12 Levels....! Das isch gar nöd möglich.  
 He lueg, ich und min Brüetsch, mir händ a zwölf Levels ganzi zwei  
 Wuche gha.

Pit                        Ihr händ das Game voll nöd begriffe! Wart emal:  
*(zu Claire:)* Eh...Dings...äh... Klääär, du häsch doch en Compi?

- Claire            *(korrigiert ihn:)* **Claire!** Chöntscht dir mal öppe märke!!!
- Pit                Was jetzt! Häscht eine?
- Claire            I mim Zimmer. *(zeigt in die Richtung)*
- (Die Jungs gehen links ab. Jetzt hört man die Mädchengruppe.)*
- Susi              BMI? Was isch das?
- Josef             *(ruft zur Tür rein:)* Claire, mir bruched dis Passwort!
- Claire             *(zu Josef:)* Momänt, ich chume grad.  
*(zu Susi:)* Body Mass Index. Dis Körpergewicht durch dini Grössli im Quadrat. D' Linda zum Biispiil... *(wird unterbrochen)*
- Susi              Hä? Und für was?
- Josef             *(ruft aus dem Off:)* Claire!
- Claire             *(steht auf, zu Josef:)* Chume! *(zu Susi:)* Susi, du bisch echt grauehaft! Naiv wienes Stück Brot!!!
- Nina              Das isch doch zum luege, ob eini übergwichtig oder untergwichtig isch.
- Claire             *(setzt sich wieder:)* Genau. Ich zum Bispiel han en BMI vo 21. Ich mues de unbedingt na abebring uf 16.
- Nina              Du spinsch ja! BMI 20-24 isch Normalgewicht. Hämmer grad erscht ide Bio duregno. Unter 20 bisch untergwichtig.
- Claire             Für Models gilt das dänk nöd. He, d Linda hät 16,5.
- Josef             *(steckt den Kopf wieder herein, genervt:)* Claire! Dis Paaaassswort!
- Lea                Chürzlich händs eini usere Model-TV-Show useknallt. Die hät en BMI vo 16,8 gha. „Zu dick!“
- Mady              Käs Wunder sind die nur na Hut und Chnoche.
- Susi                Isch dänn das nöd ungesund?
- Nina                Klaro. Kalzium- und Isemangel!
- Mady              Und was bedütet das?
- Claire             *(hört nicht zu:)* Ich mues eu unbedingt mis Linda-Janos-Album zeige. Momänt! *(geht ab)*

- Nina Mit Isemangel cha s' Bluet nüme so vil Suurstoff transportiere. Drum wird mer müed, hät Schlafstörge und verlüürt d' Läbesluscht. Au Schwindel und Konzentrationsstörige chönd vorcho. D' Negel wärded brüchig und d'Haar chönd usgheie und so wiiter.
- Susi Das isch ja extrem...!
- Mady Nöd so vorteihaft fürs Modle...! – Und Kalziummangel?
- Nina Au Kalziummangel verursacht Störige vo Haar und Nägel. Denäbet aber au no Muskelchrämpf, Herzstörige und uf längerer Ziiit möglicherwiis en Graue Star, also e Trüebig vo der Augelinse.
- Susi Ui nei...!
- Mady *(zu Nina:)* Du häsch aber guet ufpasst.
- Nina Interessiert mi halt.
- Susi Verzell das doch bitte, bitte mal minere Schwöster!
- Nina Wie dänn? Gsesch ja, sie lost nöd zue!

## 1.5. Szene

### **Jugendgruppe, Mutter**

*Es klingelt. Luana und Vanessa, die beiden Partynudeln treten auf. Begrüssungen, sie haben einen CD-Player mit dabei und suchen dafür eine Steckdose.*

- Luana Ihr werded da doch irgendwo e Steckdose ha...!
- Vanessa Mir händ hüt für eu zämegstellt: \_\_\_\_\_  
 \_\_\_\_\_  
*(nennt einige hippe Sounds und zeigt die mitgebrachte CD)*
- Mutter Sali mitenand. Chan ich eu no irgend öppis bringe?
- Luana Grüezi Frau Schneider. Eh... händ Sie ächt irgendwo e Steckdose?
- Mutter Natürlich, lueg da!
- Luana Isches ok, wänn mir echli Musig laufe lönd?
- Mutter Das isch in Ornig. Ihr Junge sölleds doch guet ha. - Oh, es hät ja fast ekei Chips meh, Momänt....!

- Susi Mami, mir mached das scho!
- Mutter Gar keis Problem, Liebs, blib du bi dine Fründe! *(werkelt am Buffet rum, bis sie von Susi ab der Bühne geschoben wird.)*
- (Kaum läuft die Musik, treten die Jungs in Claires Klamotten auf und machen eine Modeschau-Parodie! Die Mädchen klatschen begeistert, die Jungs stellen sich in verschiedenen Posen auf. Luana und Vanessa beginnen zu tanzen und schliesslich hüpf das ganze Wohnzimmer. Da kommt Claire rein und lässt vor Schreck das Janos-Album fallen.)*
- Claire Nei!!!! Mis Crêpe-Georgette-Kleid!!! Mini Paschmina Stola!!! - Aaaah! Mis Gauze-Chiffon Deux-Piece! *(brüllt:)* **Sofort uszieh!!!!** Wüssed ihr, wie tûür die Sache sind, ihr Banause? Wänn das kaputt gaht... wänn das kaputt gaht...!  
*(jagt die Jungs in ihr Zimmer zurück und ist noch aus dem Off zu hören.)*

...

Original-Manuskript: 29 Seiten



# Rollenliste

**Mutter Schneider**

**Claire Schneider** (am Model-Wettbewerb dabei)

**Susi Schneider**

**Lea** (am Model-Wettbewerb dabei)

**Sandrine** (am Model-Wettbewerb dabei)

**Josef** (Sandrines Freund)

**Roni**

**Nina**

**Mady** (Schwester von Nina)

**Tobias**

**Pit**

**Polizistin**

**Moderatorin Modenschau**

Weitere Rollen:

**Diverse Models**

**Security Leute** (in der Talkshow)